



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim



tir yimiyim

TAPAK 3



Josh Hazlewood IPL tetenzüklen masayatetsü

West Bengal nung TMC-i candidate 291 tenüng sangdongogo

VOL. XXIII ISSUE NO. 154 (ADOK 154) DIMAPUR RASEMNÜ (WEDNESDAY) METSÜREMI (MARCH) 18, 2026 ₹ 5.00

Nagaland nung Mar 21 tashi tsüingsang majungtsü

Dimapur, March 17, 2026 (TYO): Nagaland State Disaster Management Authority (NSDMA)-i Nagaland nung March 17 nungi 21, 2026 tashi tsüingsang majungtsü metetdaksüogo.

March 17 aser 18 anogotem tsüingsang kanga majungtsü saka March 20 nungi tesem kar nungbo tsüingsang tajungba akümtsü ta NSDMA-isa ashi.

March 17 aser 18 anogotem 30-40 kmph tashi mopung tesashi aontsü aser iba ajanga kojen raksatsü, süngdongtem laotsü aser power & transport

nung timtem ajurutsü. Peren, Dimapur, Kohima, Phek, Wokha, Mokokchung, Tuensang, aser Kiphire nung mopung kanga aontsü ta parnokisa ashi.

Kasa mapang Dimapur, Kohima, Wokha, Mokokchung, Mon, Tuensang, Zunheboto, aser Peren yipru süitsü saka March 20-21 nungi Kiphire, Phek, aser Zunheboto nung tsüingsang tajungba akümtsü.

Ajisüaka, Kohima, Wokha, Niuland, aser Tsemnyu district tem nung mepet agi sübangtsü.

NSDMA-i sensotem dang kümdanga alitsü aser safety measures inyaksü shiogo.

NIA-i US senso ka den Ukraine nung 6 apu

New Delhi, March 17, 2026 (Agencies): National Investigation Agency (NIA)-i America nung ka den Ukraine nung 6 tashi pua lir.

NIA-i Kolkata, Lucknow aser Delhi airport asem nung parnok apu.

NIA-i apuba US sensoji Matthew Aaron VanDyke, aser Ukraine sensotemji Petro Hurba, Taras Slyviak, Ivan Sukmanovskiy, Marian Stefankiv, Maksim Honcharuk, aser Viktor Kaminskyi nung ta jangjaogo.

Matthew VanDyke-i 2011 Libyan Civil War nung shilem agidang tetshia liasü. Pai Iraq nung IS anema raraogo aser Russia den rara nung Ukraine nung nem training agütsüogo.

Delhi nung Special NIA Court kati Unlawful Activities (Prevention) Act (UAPA), kübok par tenet anogo 11 tashi NIA ket nung ayutsü temelaba agütsüogo.

Parnok yagi Restricted Area Permit (RAP) melii India kübok Mizoram-i aru. Iba sülen ozüing alema Myanmar-i ao ta tai tonglokja lir.

India kübok north-east state

tem semdangtsü atema India nungertem Inner-Line Permit (ILP) aser bendangertem Restricted Area Permit (RAP) mesüra Protected-Area Permit (PAP) nungdaker.

Bendanger tenet yagi ethnic armed groups (EAGs) den tongtepratep aser training activities nung shilem agi. Item EAGs yagi Northeast nung telungpur teloktem den sendaktepa lir ta NIA-i benokba FIR nung shia lir.

Iba telok yagi prangpong-injang yoktsüba, telungpurtem nem training agütsü aser Europe nungi bener drones amshi. Parnoki drone warfare, operations, assembly, aser jamming technology nung temulung agütsü ta NIA-isa metetdaksü.

Ukraine nung parnok terpezü tashi anogo balala nung tourist visas abener India-i aru. Parnok Assam kübok Guwahati tashi tayimtsü ajanga aru aser iba sülen Myanmar den arrtsütepa aliba Mizoram state-i ao. Parnook ket nung documents shitak bena maliasü aser Myanmar-i ao.

India nung shilem ana lemsar Census 2027 agitsü

New Delhi, March 17, 2026 (Agencies): Census 2027 ya shilem ana lemsar agitsü, ka house listing aser housing data collection aser ka population enumeration ta Minister of State for Home Affairs Nityanand Rai-i tanü Parliament nung metetdaksüogo.

Mezüngbuba shilem atema tasüngdangbatem agütsüogo aser tanabuba shilem atema tasüngdangbatem yakta renemer agütsütsü ta MoS Rai-i ashi.

Census maparen ateam detailed instruction manuals aser

training toolkits agütsütsü. Questionnaire ji sendaktepa alirtem den asüngdangtepa yanglutsü aser iba sülen census staff, enumerators aser supervisors atema training sessions alitsü ta paisa metetdaksü.

Enumerators-i kilen shia sema senzütsü aser data bendentsü. Külen, self-enumeration indang inyakyim ka alitsü aser iba ajanga kibong nung züngsem kati online portal ka ajanga data agütsütsü akok ta Rai-isa metetdaksüogo.

Western Chakhesang nungeri Dimapur nung hohotem pusemer

Dimapur, March 17, 2026 (TYO): Dimapur nung amenoka aliba hohotemi February 21, 2026 nü Nagaland sorkar dang Foothills Road atema memorandum agütsüba pusema nungiter ta Western Chakhesang nungeri metetdaksüogo.

March 31, 2026 matongdang SASCI scheme kübok 2nd Phase Work Order agüjang ta ashiba pusemer ta Western Chakhesang Hoho (WCH) den Western Chakhesang Students Union (WCSU), Western Chakhesang Mothers Association (WCMA) aser Western Chakhesang Youth Organisation (WCYO) külemi

metetdaksüogo.

Iba mapatong dang "People's Road" ta ajar aser iba nung Naga nungeri küm aika aginüa aruba dena lir. 2013 küm Foothills Road tenzükba nungi iba mapatong ajanga nübortemi akanga noktakba aser telongjem indang kuli agüja arudar ta parnokisa ashi.

Tang teyangludak Foothills Road maparen ya nübortemi anir inyakba den sorkari nangzüka yariba mapa ka lir. Ajisüaka iba mapatong atsülangba ajanga nübortemi tamang akaba samatsü ta Western Chakhesang nungeri metetdaksü.

Iba ama tongtipang mapang ka nung timtem majrutsü atema sendaktepa alir ajak olemtepts, kati ka angatetsü aser amalitepa aotsü nungdaker. SASCI kübok two-lane Foothills Road project nung dang temulung agüja inyaksüla aser iba den tanga tebilemba memeyokteptsüla ta parnokisa ashi.

Dimapur nung amenoka aliba kin hohotem den onok külemi noktaka lir aser temulung süa mapa metembang tashi külemi yaritepa aotsü ta WCH aser parnok frontal units- WCSU, WCMA aser WCYO-isa metetdaksüogo.

Northeast India-Japan Academic Consortium amenoktsü

Guwahati, March 17, 2026 (TYO): Northeast India nungi reju 22-i Northeast India-Japan International Academic and Research Consortium amenoktsü atema Letter of Intent (LoI) nung sign süogo.

Iba ajanga National Institutes of Technology (NITs), Indian Institutes of Information Technology (IIITs), NERIST, AIIMS Guwahati, NERIWALM, Tezpur University, Gauhati University, Cotton University, aser Assam Engineering College dena reju aika sabang ka nung

anidener.

Japan-i 2022 nungi MEXT Inter-University Exchange Project kübok Northeast India nung temulung agüja arur.

Iba atema India nung nodal institution ji IIT Guwahati asütsü aser Japan nungi Gifu University ajanga yariteptsü. Iba reju anati Japan-NER Academia-Industry Cooperation Symposium 2026 ayongzüka agidang LoI nung sign sütepogo.

Iba tesentaktep ajanga science, technology, aser medicine nung lenmang tasen

aika lapoktsü imlar aser külen innovation o research partnerships adoktsü.

"Iba ajanga tapak tasen ka tenzük, state balala nungi rejutem longjemer engineers, medical professionals, scientists, aser policymakers ajak adenba consortium ka tenteter" ta IIT Guwahati Director Devendra Jalihal-i ashi.

Iba ajanga Northeast India-i global academic footprint nung ammetba aser higher education o research nung India-Japan tesentaktep akangshiba sayur.

MP Supongmeren Jamir-i NCC pur ayongzük



Dimapur, March 17, 2026 (TYO): Lok Sabha MP S. Supongmeren Jamir-i National Cadet Corps (NCC) Festival and Alumni Meet-Nagaland nung aden.

Iba sentong ya March 17, 2026 nü Regional Centre of Excellence for Music and Performing Arts (RCEMPA), Kohima nung agi.

NCC ajanga lanur nem tashi angaba, lenisüba aser tebilemstü khuret aliba rajemdaksür. NCC

ya drills aser uniforms ajanga orr lir aser iba sabang ajanga yimyatsüya, teamwork aser tenangzükba sayua aniteter ta MP Supongmeren-i jembidang ashi.

Asenok longjema alitsüla aser tashi angatsüla aser item tangatetba ajanga India ama temeyoktep aliba linük nung tebilemstü khuret abenba sensotem aniteter ta paisa ashi.

Paisa lanur cadets dang NCC training nung angazükbatem

taküm piyong benshia aotsü ayongzük.

NCC training ajanga nisungtem professionals aser leaders küma aniteta ya taoba cadets ajanga asenok dang sayur aser parnok lanuputu ajungmesor ta MP Supongmeren-isa metetdaksü.

Iba sentong nungsa Director NIELIT L. Lanuwabang aser Founder & CEO Eté Coffee Lichan Humtso na den live podcast sessions liasü.

Ex-Servicemen Rally nung Nagaland Angh aden



Dimapur, Metsüremi/March 17 (TYO): Heritage village, Kisama nung March 17, 2026 nü Ex-Servicemen Rally aliba mapang Nagaland Angh Nand Kishore Yadav-i jembia sepai tejen, Veer Naris aser tasü tait süpai kinungertem nem akhum agüja parnoki linük asoshi shilem tulu agiba tushia liasü.

Iba sentong nung jembidang Angh-i sepai tejentem aser parnok kibongtem adenba asoshi pelaba lemsatep aser bendanga agütsür tasü tai mulungsentsü nung linük tenzüker nem akhum agütsütsü asoshi ibai tongtipang sentong ka lir ta ashi.

Indian Army-i professionalism, discipline aser

temeim yimyatem amshiba aser ex-servicemen, Veer Naris aser parnok kibongtem ajangzüksü asoshi maneni inyakba atema pai tenüngsang agüja liasü.

Iba ama sentong yagi Army dak camaraderie aser taküm tepiyong yariba yimya sayur aser sepai ajunga dang linük pelaba jangjashitsür, ta Angh Nand Kishore Yadav-i ashi.

Armed forces temi bendanga agütsüba jangja alitsü tongtipang lir aser sepai tejentem aser Veer Naris ya linük tashi indang takum aliba temaitsü lir, ta pai ashi.

Parnok tasü aitba aser bendanga agütsüba otsü yagi nüburtem ajangmesor aser parnok tushia aser yaritsü

nüburtem teinyaktsü lir ta nenshitsür, ta ashi.

Pai Indian Army aser talisa Spear Corps ajanga iba rally ayongzükbä atema pelaba lemsatepa liasü.

Ano state administration-i sepai tejentem aser parnok kibongtem ajangkettsü asoshi maneni inyakba atema tenüngsang agütsü aser civil aser military institution tsingta amalitep akatsü tongtipang lir ta ashi.

Iba sentong nung (Ex-Servicemen) ESM League tiri Angh nem memorandum ka agütsüba nung ex-servicemen tebilemstü lemsatepa liasü aser Angh-ia item metokmeperi asadanga tapet mera agitsü ta ashi.

Kohima DPDB nung public service aser Urban development indang jembia



Dimapur, Metsüremi/March 17 (TYO): Ita shia amenba Kohima District Planning & Development Board senden March 16, 2026 nü DPDB Hall, Kohima nung amendang Deputy Commissioner, Kohima, B Henok Buchem-i Sustainable Development Goals (SDG) indicators aser public services inyakyim tem lepa reprangshima liasü.

Iba senden nung MLA aser Chairman, DPDB Kohima, Kevipodi Sophie menden liasü, kong Buchem-i department ajunga dang SDG indicators dak sendakba data aser osang update asüba nung temlung agütsütsü ayongzüük.

LPG supply aser digital booking system amshitsü atema oil companies, distributors aser dealers den tawa sensaksem akaba indanga DC-i metetdaksü.

Online traffic tali akumba ajanga server kera mapa meinyakba yong testüba anogo ishika timtem ajuruba osang lir, ajüsüaka Indian Oil Corporation nungi ketdangsurtemi technical team-i iba tebilemstü bentettsü asoshi inyaktar ta shiogo, ta pai

ashi.

Kohima nung consumers timba digital LPG booking amshir, anunghi district ya jenjang tajungba nung lir, kechiaser sorkari linük tesem ajunga nung noklang shilem digital booking kumdaktsütsü asoshi mera agir, ta Buchem-i ashi.

Commercial LPG supply dak sendakba tenokdangba agüja aliba nung kaket reju aser mozüki tem maden aser meperi metoktsütsüla, ta pai jangjatsü.

Hotels aser restaurants temi tebilemstü lemsatepba dak sendakba nung, district administration-i associations den teka amteper parnok nungdakba ketdangsur nem agütsütsü, ta DC-i ashi.

Deputy Commissioner-i meyi aruba atema renema alitsü nungdakba indanga jembia aser department balala den teka amteper pre-monsoon preparedness exercise aginung ajangtsü ta ashi.

Pai ketdangsurtem dang, talisa national highways nung nübu aser osettsüset peria renema alitsü ajingshia liasü. Paisa district nung lokti nübuttsü

sentong ka April 4 nü ayongzüksü ta metetdaksü.

Deputy Director, Urban Development, Kiniholi Kinimi-i iba senden nung PowerPoint presentation ka agütsüba mapang urban livelihoods yaritsü atema Kohima nung Prime Minister Street Vendor's AtmaNirbhar Nidhi (PM SVANidhi) aser Deendayal Antyodaya Yojana - National Urban Livelihoods Mission inyaktar ta ashi.

Tetsür timba sür street vendors 968 jungnüa scheme kübok loans agia lir. Khen asoshi vending zones yanglua lir aser jila nung vendors anepalua traffic tebilemstü azüoktsü asoshi ketdangsurtemi tesem tajungba bushitar, ta ashi.

Kinimi-isa Kohima urban areas nung department-i anepaluba lenmangtem indanga lemsatepa liasü.

Kasa mapang District Planning Officer, Kohima ajanga board dang Viksit Bharat 2047 vision document atema stakeholder consultation workshop ka April ita alitsü ta metetdaksü.

Fire & Emergency Services-i NOC atema metetdaksür

Dimapur, Metsüremi/March 17 (TYO): Directorate of Fire & Emergency Services, Nagaland ajanga nüburtem dang Fire Safety No Objection Certificates (NOC) meshitsü aser tasen kuma yanglushitsü atema inyakyim metetdakja liasü.

NOC tasen atema apply asürtemi anasatiba fire station nung oa application forms aser nungdakba data entry mapa renemtsüla, ta ashi.

NOC renewal atema applicants/kibur temi memonutsü mechi liwatsü anogo 45 jelia applications agütsütsüla, ta metetdaksü.

DH Dimapur nung nisung tasü mang ka lir

Dimapur, Metsüremi/March 17 (TYO): Dimapur Police ajanga sangdong ka nung ashiba agi, Emergency Medical Officer, District Hospital Dimapur ajanga East Police Station, Dimapur dangi March 15, 2026 nü shiti ka züluba nung, arishi küm 50 tain Vicky ta sür shiranger ka LRTI aser ALD tashidak agi meneper mozü kidang mozü agia munga aliba medical team-i akok tashi tajungtiba nung anepaluaka March 14, 2026 nikongdang 4:00 ako mena süogo ta shia liasü.

Iba osang ngur duty nung alirtem District Hospital Dimapur bushia ao aser tasü mang abeni shinga maru aser medical ketdangsur temi kinunger jangjatsü teyari bushia liasü.

Ozüng agi melaba maparen ajak tembangba sülen tasü mang ya jangjatsü atema Distric Hospital Dimapur nung yua lir.

Kibur/kinunger/tembar temi Officer-in-Charge, East Police Station Dimapur den Mobile No.7085055020 ajanga tongtepreteptsü ayongzüker, ta sangdong ajanga ashi.

PwDs atema special registration drive alitsü: DC Kohima

Dimapur, Metsüremi/March 17 (TYO): Kohima District Administration ajanga Office of the Regional Employment Exchange, Kohima den lungjemer Disabilities Research, Empowerment and Accessibility Mission (DREAM), Nagaland kübok mapa bushir Persons with Disabilities (PwDs) atema Special Registration Drive ayongzüksü, ta Deputy Commissioner, Kohima, B. Henok Buchem, NCS-i metetdaksüogo.

Iba registration drive ya March 28, 2026 anepdang 10:00 ako nungi nikongdang 2:00 ako tashi Office of the Deputy Commissioner, Kohima nung alitsü.

Registration atema eligibility criteria nung minimum qualification Class 8 (passed) aser arishi küm 14 tain asütsüla.

Osang tali tejangjaba metettsü atema jangra alirtemi Imnasenla Imchen den 8787610964 mesüra 7642820365 ajanga jembitsü akok, ta sangdong ajangasa ashi.

Meluri nung Basic steel fabrication training agütsü

Dimapur, Metsüremi/March 17 (TYO): Department of Employment, Skill Development & Entrepreneurship ajanga March 16, 2026 nü Town Hall, Meluri nung Basic steel fabrication indang training ka ayongzüka liasü.

Iba sentong nung tongti o jembia Deputy Commissioner, Meluri, Mhathung Tsanglao-i lanurtem dang sorkari agütsüba maongka agitsü ayongzüük aser tang aliba sorkari zünger aliba lanur ajunga nem mapa magütsütettsü, ta ashi.

Anungji iba amala maongka ya tejangraba nung agizüksüla,

ta pai ashi.

Asenok kechi nung südir süaka kanga junga training agiba sülen asenoki dangar dak metaloka malir. Asen takum alitsü mela-mela kumdaktsür aser yamaji inyakba ajanga asen kisüng yarir masü lokti yangerdaktsür, ta ashi.

Iba sentong nung Providing Access to Core Employability Skills (PACES) indang training tongmelang agi Zynirique Initiative Society nungi Tenempong Longchar-i lemsatepa liasü.

Iba training nung nisung 25 dena steel fabrication yimyatem angazüka liasü.



Nagaland tesem balala nung aliba media houses nungi osangbener tenet Bihar nung press tour senzüba mapang lir, koba Press Information Bureau ajanga ayongzüük. Bihar nung tongtipang sorkar inyakyim aser puti otsü nung tongtipang tesemtem semdanga tangazükba alitsü nükjidong nung iba sentong ya ayongzüük, koba March 22 tashi alitsü.

West Bengal nung TMC-i candidate 291 tenüing sangdongogo



West Bengal Chief Minister Mamata Banerjee-i taruba Assembly election atema TMC candidate tem list sayaba mapang tangokba noksa nung angur. Noksa nung TMC MP Abhishek Banerjee-a angur.

New Delhi, Metsüremi/ March 17 (Agencies): All India Trinamool Congress-i Mongolbarnü taruba West Bengal Assembly elections atema candidate tem tenüing sangdongogo.

Party tekolakba aser chief minister Mamata Banerjee-i lar party taruba election nung menden 294 aliba nungi 291 nung tokteptsü ta metetdaksüogo. Darjeeling hills nung tanungba menden asem nung ya Anit Thapa-i aniba Bharatiya Gorkha Prajatantrik Morcha (BGPM) pur tokteptsü.

Mamata-i, la Bhabanipur nung BJP candidate Suwendu Adhikari den tokteptsü telemtetba agiogo. Kasa mapang nung TMC-i taoba mapang Adhikari den anidaka alisang Pabitra Kar Nandigram

nung pa den tokteptsü atema shimogo.

Iba den bendenloksema Chandrima Bhattacharya, Dum Dum Uttar menden nungi, Madan Mitra Kamarhati nungi, Firhad Hakim Kolkata Port menden nungi, Kunal Ghosh Belehata nungi aser Dr Shashi Panja Shyampukur menden nungi tokteptsü.

"Onok menden 294 aliba nungi 291 nung tokteptsü. Darjeeling hills nung tanungba menden asem nung ya onok den sendaka aliba Anit Thapa-i aniba BGPM pur tokteptsü," ta Banerjee-i ashi.

West Bengal election atema TMC-i sangdongba candidate 291 nung tetsür 52, SC/ST nungi 95 aser minorities nungi 47 densema lir.

2026 Assembly elections

nung menden timba koka maneni sorkar kümtetsü ta temulung lema bilemba Mamata-i lemsatepogo.

"2026 Assembly poll nung onoki menden 226 dak tema akoktsü," ta lai ashi.

Chief minister-isa, party lenirtem aser party kübok inyakertem shirnok candidate list nung mali parnok party nung telen balala nung aniochtsü ta shiogo.

West Bengal nung election ya shilem ana küma lemsar April 23 aser 29 nü agitsü. Vote ya May 4 nü Assam, Kerala, Puducherry, aser Tamil Nadu nung den külemi azüngtsü. 2021 Bengal elections nung Mamata Banerjee-i aniba Trinamool Congress puri menden 215 akok aser Bharatiya Janata Party puri menden 77 koka liasü.

Lok Sabha nung opposition MP 8 suspend sütsür aliba aginogo

New Delhi, Metsüremi/ March 17 (Agencies): Lok Sabha-i opposition MP 8 suspend sütsür aliba agintsüogo. Speaker Om Birla-i parnok suspend sütsür aliba agintsüba sülen MP tem yagi Mahatma Gandhi nem tetushi agüja liasü.

MP tem ya February 3 nü Budget Session mapang mebenshitsu yimya beshiba atema suspend sütsür liasü.

Suspend sütsüba MP tem rongnung Indian National Congress nungi tenet aser Communist Party of India (Marxist) nung ka liasü. Parnok ya Gurjeet Singh Aujla, Hibi Eden, Dean Kuriakose, Amrinder Singh Raja Warring, Manickam Tagore, Prashant Yadaora Padole, C. Kiran Kumar Reddy, S Venkatesan nung liasü.

Taoba Army tekolakba Gen. M. M. Naravane-i Chinese aggression dak sendakba nung kaket ka züluba indang jembiba mapang Rahul Gandhi nem o mejembidaksüba atema House nung mepetmesü adokba sülen parnok ya suspend süja liasü.

Longkak aitba mapang MP

temi table-i soketa tur mendenbuba dak paper tem mereplokja liasü.

Kiren Rijiju-i motion ka benokba sülen Lok Sabha-i MP tem suspend sütsür aliba agintsüogo aser iba ajanga opposition takhangba atalokogo. Rijiju-i inyakyim kecha tetsükdaksü makai benoka inyaksü asoshi 'Laxman Rekha' ka yanglutsü nungdakba lemsatep.

Speaker Om Birla-i züingsemtem dang tarutsü nung placards mesüra AI noksatem mamshitsu mepeshia liasü.

Congress MP Priyanka Gandhi Vadra-i ashiba agi, "iba ya mapa tajung lir. Telok anapronglai House akümtsübutsula."

Congress MP Shashi Tharoor-ia, "iba ya terenlokba tajung ka lir aser külem tenzüker parnok ti tashi inyakyim nung shilem magiteti aliba tembangogo. Parnoki kechi yimyasa beshiba ajanga parnok House nung shilem magitettsüsa aküm iba yagi asen democracy yirutsür," ta ashi.

West Bengal polls: ECI-i observer 478 yokogo

New Delhi, Metsüremi/ March 17 (Agencies): Election Commission of India (ECI)-i Mongolbarnü West Bengal atema election observer 478 yokogo aser Indian Police Service (IPS) officer 19 transfer sütsüogo. IPS officer tem rongnung inspectors general ana, commissioner pezü, superintendent 12 aser deputy commissioner (Kolkata) ka densema lir.

Election ketdangsür kati ashiba agi, ECI-i assembly constituency 294 shia atema general observer kaka, police 84 aser expenditure observer 100 yokogo. "ECI-i observer tem dang parnok tata assembly constituencies Bodhbarnü tashi

nungbo tonga aotsü tetuyuba agütsüogo," ta ECI ketdangsür yagi ashi.

Paisa, observer temi parnok indang phone number tem nüburtem nem agütsütsü, ajita asünungdang political party aser voter temi parnok den tongteprateptetsü aser candidate tem, parnok tenüing nung nokdakertem aser voter tem nungi election dak sendakba nung tebilemstütem anogoshia angadangtsü asoshi mapang ka latettetsü.

Hombarnü ECI-i state police tekolakba aser Kolkata police commissioner densema IPS officer pezü transfer yokogo. ECI-i West Bengal nung April 23 aser 29 nü election agitsü ta

sangdongba sülen anogo ka lir iba ya ataloka liasü. ECI-isa, state chief secretary aser home secretary na Deobarn aonung menor transfer süja liasü.

Kasa mapang nung Chief minister Mamata Banerjee-i chief election commissioner Gyanesh Kumar dangi shiti ka zülüogo aser ketdangsürtem transfer yokba ya tim masü ta shiogo. "Kuli tejangja ka makai aser election inyakyim nung kecha aibelena meliaka item ketdangsürtem transfer sütsüogo," ta lai ashi.

Lai ECI dang iba amala jenjang magitsü mepeshia metetdaksüogo, kechiyong iba ajanga inyakyim nung tetsükdaksü adoktsü, ta ashi.

EKYC ya unauthenticated LPG customer tem atema dang lir

New Delhi, Metsüremi/ March 17 (Agencies): Asia anüolen rara adoker aliba ajanga India nung sochiokdang amshiba gas dak sendakba nung metepesü adoker aliba mapang Union petroleum ministry-i Mongolbarnü sangdong ka ajanga electronic know your customer (e-KYC) beneficiaries tem atema biometric Aadhaar authentication ya "unauthenticated" LPG (liquefied petroleum gas) customer tem atema dang lir ta shiogo.

India nung LPG customer million 330 lir, kong million 105.1 bo Pradhan Mantri Ujjwala Yojana (PMUY) beneficiary tem lir. Ajisüaka eKYC ya PMUY beneficiary tem atema deposit-free LPG connection angutsü atema mandatory lir.

"eKYC benoktsüba ya LPG consumer tem shirnok tang tashi eKYC mebenok parnok atema dang lir. Na non-PMUY customer ka süra aser taoba mapang benokatoker lira tanaben benokshitsu menüngdaker," ta ministry-i ashi. March 15 ministry-isa, "LPG consumer tem ajak Biometric Aadhaar Authentication (e-KYC) tembanga inyaksü nungdaker," ta shia liasü.

Ken o jangjashitsüba mapang ministry-i ashiba agi, iba ya tetuyuba tasen ka masü. March 15 nü osang agütsüba indang jembiba mapang ministry-i, "biometric Aadhaar

authentication tembanga inyaksü atema LPG consumer tem tali ajungmesotsü atema sorkari merangdanga inyakba nung tawa ministry-i osang agütsüba ya-a shilem ka lir," ta ashi.

"Iba ya tang tashi eKYC mebenoki aliba LPG consumers tem atema dang lir. Na non-PMUY customer ka aser taoba mapang süatoker lira tanaben inyaksü nungdak mali," ta minisrty-i post nung shia lir.

Iba osang ajanga ashiba agi, PMUY customer temi financial year shia eKYC ya khen dang benoktsü nungdaker aser ajia targeted direct benefit transfer (DBT) subsidies agizüktsü atema dang lir. "eKYC ya kidang mener angati agi ayong ayonga inyakteter. eKYC yagi inyakyim temerekba kümdaksür, shirnok temsüa ali aji tejangjaba kümdaksür, taila consumer tem raktoker," ta ministry-i ashi.

Minister of state for petroleum Suresh Gopi-i Lok Sabha nung March 12 nü ashiba agi, sorkari OMCs [oil marketing companies] nem FY 2022-23 nung sen crore 22,000 agütsüogo aser FY 2025-26 atema sen crore 30,000 agizükogogo.

State meyong OMC asem-Indian Oil Corporation (IOC), Bharat Petroleum Corporation Ltd (BPCL) aser Hindustan Petroleum Corporation Ltd (HPCL) nungeri tawa LPG 14.2kg cylinder shia nung sen 60 ajungketogo.



Asia anuolen rara adoker aliba ajanga sorchiokdang amshiba gas agi anünga akümba mapang Ranchi nung nüburtem LPG cylinder agizüktsü atema atatepba noksa nung angur.



TIR YIMYIM YIMOBILEM (EDITRIAL)

DIMAPUR WEDNESDAY, FEBRUARY (METSUREMI) 18, 2026

Mapa bushirtem asoshi

Shitakbabo Nagaland nung ya mapa inyaker meinyakma lir, saka asenoki asen lima nung adokba mapatem ya kari mereprangteter aser kari reprangtetyonga meinyakner, anungji tangarbo mapa bushia Nagaland-i arur saka asenokbo mapa bushia tangaleni aoer. Ajia kecha masü saka asen o pi na tetsüngdaji, tangar asen lima nung kecha balaka tazüngba mali ser arua inyakertermeji ita nung sen meyirijang 30 bo melamelaa aar saka asenok zünga meteter tangaleni oa inyakertermeji ita nung anarongdena sen meyirijang 15 angur. Ibaji, talisa, asenoki asen lima nung nungdakba mapatem reprangteta inyaksü mangazükba ajanga, asen lima nung tangar ayongayonga sen aika aadang, asenok bendanglen oagi tangar kibur kübok timtema inyaker aser taabo tajemba angur. Asenoki jet ta asenoki inyaktettsüba ser nung asenoki meinyakba ajanga tangari inyakba mapatem reprangtettsüba tesemtemji chiyongtsü ayokba 'restaurants' aser Dimapur nung auto rickshaw, khu abenba pick up aser taxi gari aniba mapatem ya asütsü sudi. Aji oda, Dimapur nung chiyongtsü ayokba restaurants ya zünger mezüngma lir aser itemji teimbaka tsümartemi lapokba lir. Item chiyongtsü ayokdakji Chinese, South Indian aser Continental chiyongtsü angur asünungji, yangji soruchiokertemjibo ita nung sen meyirijang 20 dak tali angur. Ano asenok lisopur chiyongtsüsa asüyonga, chiyongtsü jungjunga renemer agütsüdak soruchiokertemjia ita sen tajung angur. Aji oda, chiyongtsü ayokdak lapoka inyaksüsubajisa tajungba saka peisasa chiyongtsü ayokdak melapoktetyonga, tangar restaurant nung ita nung sen meyirijang 20 dak tali agia pei chiyongtsü nung sen meindoki inyaksüsubaji mapa tajung lir. Ano, kasaji Dimapur nung autorickshaw, taxi aser pickup gari anishir aküm nungbo, ita nung sen meyirijang 30 bo melamelaa aatsü. Ajisüaka, item mapaji asenoki Bihar aser Muslim nungertem nem teimba inyakdaksür, anungji asen yimti nung pi ita nung ayongayonga sen meyirijang 20 nungi 50 tashi aadang, asenok mapa mangu kidang mobile amshia kazür aser tangaleni oagi tangar mapa nung ita sen meyirijang 20 a majung chia inyaka alitsü indang bilemer. Aji oda, tangar chow momo kisung yangluba mapa nung ita sen meyirijang 20 agütsür saka asenok postgraduate ser tanga mapa inyakertermeji iba ita senjia matonger. Ibaji asenok tazüngba aser tangazükba tai asü mesüra asenok taküm nung nukjidong maliba ajanga asenoki asen dak aketba sempeta mejangjar aser asen lima nung nübortem nungdakba mapatema mereprangteter ta asenok ajaki süoki ia bilemdanga mapa angazüktsü aser mapa bushitsüsubaji kanga tongtibang kumogo. Atangji, tanübo alima ya yimtsüng ka ama dang, anungji pei jangraba mapa dang süra koba lima nung lia kechi inyakdir inyakaka junger, ajisüaka pei lima nung lia sen teimba aatsü mapatem aika lir ser nung tangaleni taa tilaka agia timtema alitsüsubajibo mebilemtsüla. Asenoki tangaleni pi mapa nungbo ayongayonga ita sen aika chia alitsü amai bilemer, saka asenoki bilemba ama ayongayonga ita sen tajung chia inyaksüsuba mapabo kecha nunga mali, anungji kong inyakdir inyakaka mapang shitak amshia mapa shitak inyaksü aser iba yariji taa angutsü imlaa mapa bushitsüla. Atangji, bendanglenbo mapa ajak tasak aser ita senbo tila ta masü saka ita senji aseni metetba aser inyakba mapa dak keta lir, anungji mapa kecha memetet ser bendanglen kilir mesüra kinüker asütsü mapa bushiba dang nungibo asen lima nung akaba aser nungdakba mapatem bushia inyakbasa tajungba asütsü. Aji oda, bendanglen company balala nung mapa inyakertermeji asoshibo osang tajung kaji, tan ita March 21 nü ya NIELIT aser IDAN na lungjemer, Integrated Business Hub & Innovation Center, Forest Colony nung 'Job Fair' ka ayongzuka lir, anungji iba ama sentong nunga oagi pei metetba aser jangraba mapatem asüngdangtepa bushitsü junger. Iba ama sentong ajanga asenok asoshi tajung kaji, asenok tangaleni mapa bushii aotsü melen mapai asenok bushia arur.

OLEMSABANG

SHIRNOK DANG LENNIR TAJUNG TA AJATSÜ ?

~ L. Kika Pongener.

Tsüngremi nisung shia nem sempet balala agütsü; aser sempet rongnung tajungtibaji lenisuba (Leadership) ya asütsü. Nisung aikati tanishir (Leader) asütsü kanga penbur. Nisung aikati yimden, arogo aser loktiliba balala nung lennir asütsü meranger aser bushir. Ajisuaka, tanishir (Leader) ka asütsüba ya aginua penbuba, pei sasa meranga shikkaba (Practise); tangar jilo ajizüka benshiba (Imitation); iba amaji merangdangba kisung agi dangbo makoktsü sudi. Kechiyong lennir ka asütsüba ya shisaliok jenjang (Qualification & Degree) tulu ngua azüngba kisung agia makoktsü sudi; kaket azüngba nungi anguba shisatsü (Knowledge) tulu akaba kisung agia makoktsü; Sorkar aser company mapa balala nung temaba menden (High Position) nung tenzükba kisung agia makoktsü sudi. Kechiyong lenisuba sempet yabo tsürabur nungi azü (Blood) nung senmangtepa aruba sempet rongnung ka lir. Tsüngrem nungi anguba shisatsü (Wisdom) keta alinung dang akoktsü. Anungji, nisungi pei sasa merangdangba kisung agi anguba sempet masü; saka tasodangyongi Tsüngremi balaka shiteta agütsüba sempet lir. Anungji lenisuba sempet yapo tenukmeremba agi memeremzüktsü, arishiyonga memenuptsü aser rakzüknyuyonga merakzükttetsü.

Alima nung nisung ajaki akümstsübuba (Respect) ya kanga aginur; aser tangar nema akümstsübudaktsünur. Ajisuaka, asen sasa tangar nem akümstsübudaktsünuba agi tangari asenji akümstsübur masü, saka tangari asen akümstsübutsubaji asen jaklaliru jembishinu, libaliru aser asen mapa dak tuluka keta lir. Aji oda, asen jembishinu tajung, libaliru tajung aser asen mapa tajung ngur tangari asenji akümstsübutsuba alitsüla. Ajemalua tila kümer, tular-tilar, takar-sensaker ajak den küsa lirumedema litetra, tangari asenji akümstsübutsuba. Nisung ka tangari akümstsübutsuba ya rongsen tulu akaba agi; takar asüba agi; tular asüba agi; ki tulu tajung nung aliba agi, gari 'Luxury car' nung mener senzüba agi; mesura aso-ajen tobur ajungba; iba kisung jagi akümstsübur masü...Na aser ni-ji tilar aser sensaker ka asütsü akok...Mesura kecha jenjang makaba nisung asütsü akok...Saka asen jaklaliru, jembishinu, libaliru tajung aser tular-tilar ajak den küsa litetra tangari asenji akümstsübutsuba. Ajak dang alia, shirnoki tangar dang akümstsübur pa/laji tangar-ia akümstsübutsuba. Mazüng-memeter aser mashi-malo nisungi tangar dang akümstsübutsubaji jenjang alur amai bilemtsü; saka iba ama jakla jagi pa/laji kecha memetetba nisunga ta tangari shisang-shisanga jangjar.

Shirnok dang lennir tajung ta ajatsü...??? Lennir tajung ta ajatsüba ya odangbo ajar masü, pa/la lenisuba nung nuburi tamang kaateter asü makateter (?) Pa/la lenisuba nung nuburi mulungsoa anidaker asü (?) Mesura tanidaknur malir (?) Pa/la nem nungloktsüba mapa nung pei ajangzüktsüba nung rangloker inyaker asü (?) Mesuralokti ajungtsü atema pei takoksa arema inyaker (?) Lennir tajungi tangar dak tajung aliba reprangteter aser tenungsang agütsür... Lennir tajungi lokti nung mepetmesu alidang yimjung yanglur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Maharashtra nung anti-conversion law agizükogo

Mumbai, Metsüremi/March 17 (Agencies): Maharashtra state assembly nung March 16 nikonngang anti-conversion bill agizüka Khristan lokti balala aser political party temi memulungba senzüka yutsü aser India nung iba ozüing amshiba state 13 buba akumtsü lenmang lapoktsü.

Tang agizüka aliba draft law - Freedom of Religion Bill 2026 - ya state indang Legislative Council-i temelaba agüja aser state governor-i meyongnem agütsüba sülen ozüing ka akumtsü.

Iba ozüing ya Hindu bhukumba Hindu Bharatiya Janata Party (BJP)-i anir state nung ruling government-i nungmesoa liasü.

Tamangertem aser opposition politician temi iba mera ya aitsü aser Muslim aser Khristanpur dak tenük yoktsü aser ajemreptsü atema iba draft law ya hadir ka ama akumtsü, ta ashir.

Maharashtra Chief Minister Devendra Fadnavis-i assembly nung iba bill yagi tashiyim amshia, ashikülak yimya amshia, merenshia, mesüzüka mesüra mashi lenmang nungi tamangba yimsü melenba nokdangtsü aser temerenshi tesashi agütsütsü, ta ashi.

Kibong akumtsü mechi temelaba makai tamangba yimsü melenba atema tepuokdak küm tenet ayutsü aser senchi sen 100,000 achitsü bill nung shia lir. Tamangba yimsü melenba ya tanur, tetsür mesüra tribal mesüra Dalit kin nungi asünungbo senchi ya pongusü

agi tali asütsü.

Maneni aibelener tepuokdak küm ter tashi ayutsü aser senchi sen 700,000 achitsü.

Iba bill ya benokdang Mumbai nung aliba Bombay Archdiocese aser lokti tentet 30-i anema nokdak aser tamangba yimsü temeden alenba nung amshitsü ta ashi.

"Bill yagi iba ozüing ya nok-nü ka ama kumdaktsütsü bushir aser tamangba yimsü balala kibong kumner anema tsürabur, kinunger aser kidanger tem sashi-sashia nokdaktsü jenjang agütsür, kechiaser nisung mashi kati police nem ken o tiazü agütsütettsü aser apuani merenshitsü," ta All India Catholic Union indang odongtar aser osangbener John Dayal-i UCA News dang ashi.

Danga state tem nung ama masü, Maharashtra nung iba ama ozüing tesashi yanglutsüsa tamangba yimsü melenba tali akumba mesüra tamangba yimsü balala amanger tsüingta kibong akumba kuli tejangja magütsü, ta pai ashi.

"Kangshia mesüra mesüzüka tamangba yimsü melendaktsüba, talisa tetsür tem Islam mesüra Khristan yimsü agizüktsü ajungshir ta tai tonglokja aliba mittsü aser merenshitsü atema Maharashtra nung ozüing peria lir," ta Dayal-i ashi.

Merenshia, kangshia mesüra mesüzüka süang, Hindu yimsü dang temulung meyiptsübo ajungshir aser ibaji tangatetba meshidak ta sayur, ta pai ashi.

Iba bill nung kanga sashia o intepba provision ji nisung ka tamangba yimsü melentsü atema jelia temelaba agütsü mesüra anogo 60 jelia osang agütsütsüba ya lir, ta Catholic lawyer aser Watchdog Foundation indang founder-trustee, Godfrey Pimenta-i ashi.

Iba provision yagi constitution nung right to privacy aser freedom of conscience temelaba agüja aliba ajembanger, ta pai UCA News dang ashi.

"Inducement" ta tongmelang agi shia aliba ajanga Khristan missionary temi humanitarian mapa inyakba, education aser healthcare agütsüba aitsütsü akok, ta Pimenta-i ashi.

Iba bill yagi aibelener bail nung agizüktsü memelar, tashiyim amshia tamangba yimsü melen ta ashishiba nung police temi mera agütsü melar, aser iba yagi tiazü nung mesüra tebilemba tamajung nung ken o benokdaktsütsü lenmang tesadamba agütsür, ta Pimenta-i ashi.

Bombay Catholic Sabha advocacy group odongtar Dolphy Dsouza-i bill indang clauses ya "draconian" lir ta ashi aser item ya kin tila, tetsür aser tamangba yimsü balala tsüingta kiyimba anema amshitsü ta shia liasü.

Iba ozüing yagi lokti nung telemsa tali adokdaktsütsü aser kin tilatem aser tamangba yimsü balala tsüingta kiyimba nokdangtsü asoshi aser pei tangatetba nung tamangba yimsü melentsü bilemer anema hadir ka ama amshitsü, ta pai ashi.

ANOGO ABEN TSÜNGREM DEN

Tzüsem Temalen Reprang - T.Ken 93:1-5

Tamajunger mapa agi na nungpanga arudang nai kechi inyaktsü? Ken züluri kechi inyak aji inyakang. Pai Tsüngremer chuba menden reprang. "Kibubai chubar; pa sentsüwangshi agi sobua lir; Kibuba tashi tait agi sobua lir; iba jagi Pai pasasa naibanga lir: alimaji marakzütettsüsa tenteta lir" (t.1). Yipru mopungi Kibuba chuba menden marakzütetdaktsütsü: saka aiben asenoki temalen merepranger. Asenoki yipruji angur saka Tsüngrembo mangur. Asenoki tzüsem temaba temabai angur, aser asenoki tamang agi Tsüngrem chuba menden akanga yanglua aliba mangur.

Ano ken züluri Tsüngremer taküm kuli angashi. Pai tzüsem nungtepba ola manga. Tanü nai tetsübuttsü ola aika angashitsü akok. Item nung temulung tagütsü. "Ne kidang teti tatem maka temeshi alitsüji tim dang" (t.5). Ken züluri Tsüngremer taküm kuli angashi aser ashi, "Ni Tsüngrem O nung amangtsü akok."

Iba ken yagi Peter tzüma nung jajaba bilemtetdaktsür (Matt. 14:28-31). Pai pa tenük Kibuba nungi pilar aser Pa tenangzükba amatok. Yisui pa dang ashi, "Arung." Peteri nüngdakba ajunga agi ibaji dang liasü. Pai pasasa dang ya ashitsüba liasü, "Yisui 'Arung,' ta ashir süra, ni arutsü akok"- kechiaser teti pa ozüingji ain agütsüba lir.

Tsüngrem chuba menden yanglua lir, aser Pa taküm kuliji shidak. Kodang nai yipru aruba ngudir, Tsüngrem chuba menden angutsü asoshi ne tenük azükleni rangketa yokang aser Pa angashitsü asoshi ne narong lapokjang. Pai tashi aser ain agütsütsü nangzükba nung ne tamang yuang aser amangang.

Nigeria nung tamanger ka tepset, nisung pongu pua bener ao

Abuja, Metsüremi/March 17 (Agencies): Fulani kiralongrar südi ta temulung meleme alirtemi March 11 nü Nigeria anüolen Khristan ka tepset aser pongu pua bener ao ta osangtem ajanga ashir.

Kwara state kübok Irepodun area nung aliba Oyatedo yimtsüing amakdang John Omoniyi Ajise ya tepset aser pa kinungtsü aser ano tamanger pezü pua bener ao, ta Kwara state nung aliba Evangelical Church Winning All (ECWA) indang tir Rev. Samuel Adewumi aser tezülur Rev. Dr. Joseph Agboluaje nati sangdong ka nung ashi.

Omoniyi Ajise ya ECWA Vice President Rev. Sunday Stephen Ajise tenu liasü.

Khristanpur tepsetba aser

pua bener aoba timtem balala atalokba rongnung iba ya tesüsaba atalokba lir, ta Adewumi aser Agboluaje nati ashi.

"Pastor aika tamangertem makai lir, aser züingsem aser nübur aika pei ki yutsür jena aotsüsa kumogo. Rongsenketzüing inyakyim nung kanga sashia kongshioigo aser kibong aika kanga timtemtar," ta sangdong nung ashi.

Kwara state kübok Ilorin, Omu-Aran, Igbaja, Oro-Ago aser Fate-Tanke indang ECWA Districts Church Councils lenirtem ajunga senden ka amenba sülen parnoki iba sangdong ya agütsü.

Ano Khristanpur timba aliba Ahun yimtsüing nungia

taoba mapang tamanger Dada aser Ishola pua bener aoba arogo lenirtemi ashik.

Kwara state nung aliba police temia timtem balala agütsüba lir ta ashi aser parnok aputsü meranger ta ashi.

"K e t d a n g s ü r t e m anisüingzüka mekazür. Inspector General of Police-i Kwara state semdang aser state nung banditry ya tesüiba otsü ka kumdaktsütsü pai nangzük. Onoki tawa nisung kar pua lir, aser bushisüingdang tembangba sülen temulung meleme alirtem anema court nung ken o benoktsü," ta Kwara State Police Command indang odongtar Adetoun Ejire-Adeyemi-i ashi.

October 1, 2024 nungi

September 30, 2025 tsüingta Nigeria nung Khristanpur tepsetba dang timba danga linük kecha nunga tepseta mali, ta Open Doors indang 2026 World Watch List ajanga ashir. Iba mapang alima nung tamangba yimsü mechi Khristanpur 4,849 tepsetba nungi shilem 72 (3,490) Nigeria nung lir, aser iba jakdang tamanger nisung 3,100 tepseta liasü. Alima nung Khristanpur alitsü linük tamajungtiba 50 asadanga World Watch List 2026 nung Nigeria ya jenjang 7 buba nung lir.

Nigeria aser Sahel nung Muslim Fulani ya million aika lir aser parnok tezü balala nungi jakzük saka aikati tashiyim mamshir, saka Fulani kari radical Islamist

ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung shia liasü.

"Parnoki Boko Hara maser ISWAP tasa den mesüktepa amshir aser Khristanpur dak tenük yokba tejangja sayur," ta APPG report nung shia liasü.

Nigeria nung aliba Khristan lenirtemi ashiba agi, shiruru metsürtemi Nigeria indang Middle Belt nung Khristanpur amakba ya tashiyim amshia Khristanpur ali agütsü aser Islam yimsü benoktsü tejangraba nung lir, kechiaser lisem lima kuma aoba ajanga parnok indang shiruru takum kumzük

ayutsü tasak akumer.

AO OSHI ANGAZÜKDAK:

TANÜ ANGAZÜKTSÜBA OJANG



Wakdak

(v) tejashi nung (in angry mood)

* Kinungboi tangar dak wadak kinungtsü merenshi

Wakdak

(v) tebok waka akümba (stomach bloating)

* Chiyongtsü meshitak chisem dang tebok wakdaka ayur.

OLONG PAITEP # 7447

15x15 crossword grid with numbers 1-16 indicating starting positions.

TIPLÉN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T___lu - (3)
10. Takdang temalen - (9)
11. Tesa___a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ur - (3)
4. Kiojen yangludak - (6)
6. _____ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ____adenshi - (4)
14. Tsünüsenbongtsü adokdak - (3)

OLONG PAITEP # 7446 TELANGZÜBA

TIPLÉN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Süjak, 10. Aonung, 11. Dokan, 13. Tinu.

NAI-A YA METETTER



March 15, 2026 nü Mexico City yimtiba Zocalo nung "largest football lesson in the world" atema Guinness world record ka yangluogo.

Zócalo square nung nisung 9,500 adenshir minute 35-40 training session nung shilem agia liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimyim bureau tem nung agüjang.

Assam nung Sahitya Akademi Award angurtem tushir



Guwahati, March 17, 2026

(Agencies): Assam Governor Laxman Prasad Acharya aser Chief Minister Himanta Biswa Sarma nati March 16 nü Sahitya Akademi Award 2025 angur nem tenüngsang agütsüogo.

Assam nungi kaketzülur ana- Devabrat Das aser Sahaisuli Brahma nati Sahitya Akademi Award 2025 angu.

Devabrat Das-i Assamese novel Kori Khelar Shadhu aser Sahaisuli Brahma-i Bodo novel

Dwngnwi Lama Mwnse Gathon atema sempettem agizüka liasü.

"Kaketzülur anati sempet anguba ajanga Assam asoshi konang tulu bentsür aruogo aser state nung kaketkeno senmang takar sayuogo. Tenati maneni Indian literature nung shilem agitsü aser lanu putu ajungmesotsü imlar" ta Governor Laxman Prasad Acharya-i ashi.

"Assam nung kaketkeno national level nung agizükogo.

Kaket zülur anaprong nem tenüngsang agütsür aser tenati maneni takok angutsü moatsür" ta Chief Minister Sarma-i ashi.

Das ya Assamese literature nung post-modern voice ka ta züngshir aser pai kaket 25 tema züluogo. Pai fiction, non-fiction, screenplays, reviews aser critical essays zülur.

Tanü National Academy of Letters-i taküm Sahitya Akademi Award atema kaketzülur 24 shimtetba osang metetdakja liasü.

Mizoram sorkari 'Operation Jericho' atsülangtsü akok

Aizawl, March 17, 2026

(Agencies): Mizoram sorkari anti-drug campaign 'Operation Jericho' atsülangtsü atema bilemer. Iba maparen ya taküm March tashi dang inyaksü züngzüka liasü saka ketdangsurtemi Myanmar den arrtsülen tensa asadangdar.

Iba campaign ya September 1, 2025 nü Mizoram Police, state excise department aser Young Mizo Association (YMA) külemi tenzüka liasü.

Parnoki cross-border drug trafficking azüoktsü atema iba mapa tenzüka aser mezüngbo December tashi atema dang sentong renem saka taküm March ita tashi atsülanga liasü.

Kilometer 510 talang India-Myanmar arrtsülen mozü shibelenba atema tebilemstü bena state sorkari iba campaign maneni inyaka aotsü atema asadangdar ta ketdangsurtemi ashi.

Honibarnü State Home

Minister K Sapdanga-i Lawngtlai district kübok Zochachhuah nung India-Myanmar arrtsü semdang aser security assessment ka agiogo.

Iba mapang Minister Sapdanga-i March sülen-a iba mapa inyaksü atema bilemdar ta ashi.

"Mizoram sorkari arrtsü ajanga senzürtem mita repringtsü atema dedicated system ka nüngdaker" ta pai ashi.

Mizoram minister-i mashisa tetsür ka asüba atema tatok meshir

Aizawl, March 17, 2026

(Agencies): Mizoram nung arishi küm 31 tain mashisa tetsür ka government hospital nung maniokba ajanga asüba atema tatok meshir aser iba tatalokba bushisüngdang asütsü ta Mizoram Health Minister Lahrinpui-i metetdaksüogo.

Iba ya March 12, 2026 nü Lunglei district kübok atalok.

Assembly Conference Hall nung Mizoram Universal

Health Care Scheme (MUHCS 2.0) tenzüka sentong nung Minister Lahrinpui-i ojembidang hospital staff-i tetsürla anioktsü memulungba atema temulung raksar aser iba ya magizüker ta ashi.

"Health minister ka ama ni tebilemstü khuret abener aser tasür kibong dang tatok meshir. Iba tatalokba atema formal inquiry ka tenzüko" ta lai ashi. Tasür ya F Lallawmkimi ta

jangjaigo. La ajungbena tanur asotsü kangshi aser iba jagi lar kinungertemi Civil Hospital, Lunglei-i anir ao. Ajisüaka staff-i yipden tazüng mali ta shir maniok.

Iba sülen Lallawmkimi temang mejungi aküm aser süadok.

Iba bushisüngdang ajanga kulitem angutsü aser aibelenertem dak tapet temerenshi alitsü ta minister Lahrinpui-i nangzükogo.



Tezpur University nung Department of Mass Communication and Journalism nungi kaketshrtemi National Youth Festival nung takok tulu ngua Assam asoshi konang bentsür aruogo. Iba benjung ya Association of Indian Universities (AIU)-i Chennai nung ayongzüka amung aser Tezpur University nungi Rahul Rohan Paul-i English Debate aser Hindi Elocution naprong nung tanabuba jenjangtem takok angu. Maneni Tezpur University nungisa Shashank Buragohain-i Western Instrumental Solo nung tasembuba jenjang takok ngua liasü.

Kabul mozüki ka nung nisung 400 tepset ta ashiba Pakistan-i magizük

Kabul, Metsüremi/March 17 (Agencies): Pakistan-i Kabul nung drug rehabilitation mozüki ka anüing ajanga amakba sülen nisung 400 dak tema tepset aser nisung 250 yirutsü, ta Afghan Taliban sorkar otongdar kati Mongolbarnü metetdaksüogo.

Pakistan-i iba osang ta tai ta shiogo aser parnoki Hombar aonung military installation tem aser kiralongrartem nem teyari agütsüba infrastructure tem dang amak ta ashi.

"Anüing ajanga amakba sülen iba tesem nung ano bomb apokba ajanga injang aser bomb tapu balala aika yua aliba jangja jangja sayur," ta Pakistan Information Minister Attaullah Tarar-i X ajanga ashi.

South Asian nung kidanger linük ana tsüingda yimjung atema sensaksemtsü asoshi teyari agütsütsü renema lir ta China-i ashiba sülen ghonda ishika lir Pakistan-i anüing ajanga iba tesem maka liasü.

China-i linük anaprongla dang rara mora meyoki sensaksemtsü asoshi mepeshia metetdaksüogo.

Rara koba taoba ita tenzüka liasü, iba rara ya kidanger ana tsüingda rara tamajungtiba lir. China densema linük balalai teyongtsüi ia rara tembangdaksütsü merangba mapang ano asendenshir rara tenzükogo.

U.S aser Israel nati Iran amakba den Iran-ia meyiper linük balala amakba mapang ka nung tang kidanger linük ana ya-a taliba raratepa parnok meketa aliba tesemtem kanga mesüingjemteti kümogo.

Interior ministry otongdar Abdul Mateen Qanie-i ashiba agi, iba lendong nung nisung 408 tepset aser nisung 265 yirua liasü. Afghan nunger ketdangsürtemi ashiba agi, asürtem aser yirur alirtem ya kabul temeket nung mozüki balalai benerogo. Ajisüaka parnoki tasü mang kwi ngutet

aser asürtem ya koda züing dang iba indang osang tejangja magütsü.

Iba tesem nung alirtemi ashiba agi, iba mozüki amenoka aliba tesem nung ya taoba mapangbo military base ka amenoker liasü.

Tenük kuli agütsürtemi ashiba agi, mozüki nung alirtem nikongtsütsü sarasadem agiba tembangba mapang parnoki bomb asem apokba ola angashi aser bomb anati shirangertem yua aliba takdangtem dak kongshi.

"Iba tesem nung mi adoka liasü," ta arishi küm 50 tain Ahmad-i ashi, shiba mozükidang temang anepalua liasü. "Kü medemertem mi nung arong saka onoki parnok ajakbo mekümzüktert," ta paisa shisem.

Local media-i lemsatepba video balala ajanga ki ka mi agi rong aliba aser tekümzükertemi tasü mangtem bener aoba nguogo.

Iran rara mechi US National Counterterrorism Centre director-i mapa yutsü

Washington, Metsüremi/March 17 (Agencies): US National Counterterrorism Centre indang director, shibai kiralongrar tebilemstü nung US Tir Donald Trump aser director of national intelligence nem shisatsü agütsür, pa Iran rara mechi mapa nungi anenogo.

Mapa nungi anenba shiti ka X nung lemsatepba nung, tangatetba tajung nung pai tang rara aliba maginer, ta Joe Kent-i ashi.

"Asen linük nem Iran-i timtem tulu agütsütsü tejangja mali, aser Israel aser iba indnag tashi tain American lobby nungi ajungshiba mechi asenoki iba rara ya tenzük," ta pai ashi.

Trump-i taoba mapang bendang lima nung US sepatem raraba tembangdaksütsü nangzükba tutetja, "Middle east nung rara yagi asen linük meimertem tesüiba takumtem

Kent-i "timtem tulu" ta amshiba ya tongtipang lir.

US aser Israel nati February 28 nü nungi Iran amak tenzükter Trump administration nungi ketdangsür tejangjatiba mapa yutsüba Joe Kent ya alitsü.

Kent-i "timtem tulu" ta amshiba ya tongtipang lir.

US ozüing kübok congress nungi temelaba magi US tir temi mitkar amshia amaktsü atema iba ojang ya kanga tongtipang ama amshia aru. International law kübok sovereign linük amaktsü asoshia ibai tongtipang lir.

Kent ya US House of Representatives atema nübuyima jajaba nung tamakok

ajuruba sülen Trump-i pa nem iba mapa ya agütsü.

Kent ya taoba mapang Army Ranger ka liasü aser US Special Forces nunga züingsem ka ama Middle East nung küm 11 tashi oa liasü. Pa kinungtsü ya ISIL (ISIS) suicide bomber kati Syria nung 2019 küm tepset.

Pa mapa yutsüba shiti nung Kent-i pa kinungtsü asüba ya Israel-i yangluba rara ka nung tepset ta ashi.

"America nübür tajanzük maliba mesüra America nunger takum samaba jangjatsü maliba rara ka nung tarutsü putu yoka rara asütsü atema yoktsü ni memulunger," ta pai zülu.

Iran rara tenzükter tang tashinung America nunger sepai 13 takum samaogo. Iran nung nisung 1,444, Gulf region nung nisung 20 aser Israel nung nisung 15 süogo.

Kent-i mapa nungi anenba shiti nungya Trump indang "Make America Great Again" movement nungi tejangja nübü kari rara anemba indanga shia liasü.

Mapang talangka US military engagement tembangtsü aser "America First" südaksütsü nübuyimba mapang nangzükaka Iran den rara nung tetsüing ajemokba asoshi nisung aikati Trump aija lir.

Trump aser pa den yariteper temi iba rara ya hopta ishika tsüingta tembangtsü ta aiben shia arur, saka aikati mapang talangka raratsü ta tekumdangtsü shia lir. Congress nung Republican ozüing yanglurtem Trump sülen nokdaka lir.

Iran amakba asoshi mezüingbo Trum administration-i par missile aser nuclear sentong nung temeyong tuluktsü, saka parnoki kuli magütsü. Iba sülen 1979 Islamic revolution sülen Iran inyaksangshi ya US asoshi tebilemstü lir ta ashi.

Kent-i züluba shiti nung Trump dang Iran den raraba anendaksütsü ajungshia liasü.

MOLUNGNEN O



ASO: 18.01.1927

ASÜ: 02.03.2026

Onoki teti meima aliba aser kodanga amatsü makokba tsürabur asür **Arienla (Khar)** mapang tatsüka shirangba nungi tenzüka ali wadang tembanger kinungertem mangyimba anogo tashi nung kiyonger, yimer yimsanger, temeimertem, Arogo, lokti tentet balala aser kija kibong shirnokisa onok den nübo, rongsen, shisatsü aser sarasadem agi yaritepa aruogo, ozü kinunger aser anükapangtemi nenok ajak dang kanga pelaba lemsateper.

Nenok temeim aser mapa tajung Teyanglur Tsüingremi moajang ta sarasademtsür.

~ Temeim Chirurtem, Kinunger & Semchirse mnurtem.

Tepela aser Tetushi Sangdong

Mokokchung Senso Mungdang Office ajanga yimeryimsanger ajak tenüing nung yimtsür senso tajung anati shisaliru nung takok tulu aser khonang nüngsang ajangzüktertba asoshi tepela sangdong den tetushi agütsür.

- Miss. Sunepjungla Aochenlar**, D/o Lt. Lipokmar Atsongchanger, 2026 NPSC tatidang nung takok ngua Health and Family Welfare Department nung Drug Control Officer post ajangzüktertba asoshi tetutshi tulu agütsür.
- Miss. Sentitula**, D/o Lt. J. Maputemjen Kichu, Primary Teacher, PS No. 5, Alongmen Ward, 25 Mongya A/C, Mokokchung nungi 2026 küm Booth Level Officer Nagaland state nung tajungtiba jenjang anguba asoshi khonang tetushi agütsür.

Sd/- L. Kari Kichu President	Sd/- T. Lipokyanger Pongen Secretary
Mokokchung Senso Mungdang	Mokokchung Senso Mungdang

ALI AYOKER	AT NIHOTO VILLAGE (NEAR 4 LANE) PLOT AVAILABLE @180/- Per Sqft. (Slightly Negotiable) Contact: 9612242850
-------------------	--

Nigeria kübok Maiduguri nung nisung 23 tepset



Maiduguri, Metsüremi/March 17 (Agencies): Nigeria nung Maiduguri yimti kübok tesem asem nung bomb pokdaksüba sülen nisung 23 tepsetogo aser nisung 100 dak tema yiruogo, ta police-i metetdaksü. Pei temang nung bomb alenoker pokdaksürtemi lendong bener arutsü asütsü ta temulung melemba bilemba tesemtemi explosives' clearance team tem yokogo.

Iba lendong ya Hombarnü atalok, saka nisung asüba osangbo Mongolbarnü metetdakja liasü. Bomb ya University of Maiduguri Teaching Hospital kikümtong aser local shishilembadak ana

nung pokdakja liasü, ta Maiduguri nung Nigeria indang National Emergency Management Agency (NEMA) operation tekolakba Sirajo Abdullahi-i ashi.

"Bushisüingdangba sülen bomb ya pei temang nung alenoker pokdaksürtem pokdaksü asütsü ta ngutetogo," ta police otongdar Nahum Kenneth Daso-i Mongolbarnü ashi.

"Tetasatsüka nisung 23 taküm samaogo aser nisung 108 yiruogo," ta paisa shisem.

Iba bomb pokdaksüba ya telok kati danga nangzükaka mali. Nigeria nung tang telungpurtemi kanga dang

timtem agütsüba mapang Borno State yimtiba Maiduguri nung iba lendong ya atalokogo.

Boko Haram aser West Africa Province (ISWAP) nung ISIL (ISIS) den sendaktepa aliba teloktemi iba ita Borno nung army tamendakdak aika makogo aser iba mapang sepaitem aika tepsetba den prangbong injang aika rakzükterogo.

Nigeria military-i taoba mapang ashiba agi, Hombarnü Maiduguri tezülen telungpurtemi parnok amakba nokdangogo.

Borno State Angh Babagana Zulum-i Maiduguri nung bomb pokdaksüba ya aitsüogo aser ashiba agi, Sambisa arem nung tang military-i operation benoka inyaka aliba dak iba ya sendaka lir.

Borno State police otongdar, Nahum Daso Kenneth-i ashiba agi, bomb apokba osang angazükba sülen emergency responder tem item tesemtemi yoka liasü.

"Yimti nung alirtem dang süngjemshitsü aser ken o maneni asadanga aliba mapang item tesemtemi maotsü ajungshir," ta pai ashi.

Josh Hazlewood IPL tetenzüklen masayatetsü



Metsüremi/March 17, 2026

(Agencies): Australia nunger nungtuugu pacer Josh Hazlewood IPL 2026 tetenzüklen masayatetsü. Pa yiruba ajanga mapang talangka masayai arudar aser maneni asaya tenzüksü atema mapang atsülanga odar.

Codesports.com sangdong ka ajanga ashiba agi, Australia nunger asayar ya ita aika masayai arur aser fan tem ano pa asayaba repringtsü atema mapang tatsüka atatsüsa akümtsü.

Kasa mapang nung Australia nunger asayatem aika Pakistan Super League (PSL) nung asayatsü masayatsü terata nung lir, kechiyong Pakistan nung security dak sendakba nung mepetmesü adoker lir.

Josh Hazlewood ya hamstring aser Achilles yiruba ajanga asaya tenzükshitsü asoshi mapang talangka agidar. Pa Royal Challengers Bengaluru nungi mezüngbuba asaya ana masayatsü akok aser iba tetezü pa April tom tashi masayatetsü. Iba mapang tashi nungbo pai masayai ita pongu ajungtsü.

TimesofIndia.com sangdong ka ajanga ashiba agi, Australia nungersa Pat Cummins-a teberem yiruba tang anepaluba mapang ka lir, aser pa kodang iba asayamung nung Sunrisers Hyderabad nungi asayatsü mejangja.

Asayar anaprongla kidang asayaba asayamung timba nung masayatet aser T20 World Cup nunga masayatetsüsa aküm.

Ketdangsurtemi ashiba agi, tena masayaba ya internasional asaya melena IPL nung asayatsü shimba masü saka taneptsü mapang shitak nung mongutetba ajanga lir.

Cricket Australia-i tena kanga kümdanga anepalua arudar, kechiyong parnok Test asayamung aika asayatsü lir aser iba den World Cup-a ka asayatsü lir.

Australia nunger kar IPL atema renemba mapang Steve Smith, David Warner, aser Glenn Maxwell nunger PSL atema renemdar. Ajisüaka Pakistan aser Afghanistan na mangatetep adoker aliba aser iba den parnok anasa Iran nunga rara adoker aliba ajanga parnok terata nung lir.

Asayatem dang tang rara tenzükler aliba aser senzüsenpong dak sendakba nung tetsüdaksü aliba indang tekümdangtsü metetdaksüogo.

Kasa mapang nung Peshawar nung asaya ka asayatsü aliba ya ajak dang shibulutsü takeba lir, kechiyong iba tesem yagi maotsü atema Australia sorkari tekümdangtsü metetdaksüogo.

Tetsüba süshidaksütsü atema Pakistan Cricket Board-i, nungdak dang süra asayatem anintsü atema jurila tayimtsü ka amshitsü benokdangango.

Neymar Brazil team nung mezüngoksem



Metsüremi/March 17, 2026

(Agencies): Brazil nunger nungtuugu asayar Neymar, France aser Croatia na den friendly asayatsü atema national team nung mezüngoksem. Tang team nung mezüngoksemba sülen Neymar taruba FIFA World Cup nung asayatsü timla aliba nung tetsüdaksü adokogo.

Kasa mapang nung striker Endrick bo team nung lir.

Brazil team France den March 26 nü Boston nung aser Croatia den Orlando nung March 31 nü asayatsü, koba coach Carlo Ancelotti-i May 18 nü World Cup team

mesangdong tsüngda tatembangbuba asaya asütsü.

Hombarnü team sangdongba sülen Neymar-i ashiba agi, friendly asaya ana atema Ancelotti-i pa meshimba atema mepelar ta ashi.

"Ajisüaka ni anogo ka nungi anogo ka, training ka nungi ka aser asaya ka nungi ka dak rangloker lir. Onoki nükjidong tongtettsü. Tatembangbuba squad mesangdong lir," ta Neymar-i ashi.

Neymar ya Brazil nunger rongnungi goal (79) timtiba idaktsüba asayar lir saka pa yiruba ajanga 2023 küm

October ita nungi national team nungi masayai arudar.

Deobarnü Corinthians den goal 1-1 agütsü tembangba asaya nung Neymar minute 90prongla asayaba sülen pai pa FIFA World Cup nung asayatsü nükjidong aliba lemsatapa liasü. Iba asaya ya Ancelotti indang assistant anati repringa liasü.

Kasa mapang nung hopta tom nung Ancelotti-i repringa lia asayaba asaya ka nung Neymar-i kecha balaka junga masayateti liasü.

"Neymar 100% nung mali anungji pa list nung mali. Pa temang junga kümra list nung züngoksemtsü akok. Neymar World Cup asayatsüsa akok," ta Ancelotti-i Hombarnü ashi.

Endrick, shibai Real Madrid nungi or Lyon nung adenba sülen asaya 12 nung goal trokbo idaktsüogo, pa Ancelotti kübok tang mezüngbuba team nung züngoksemogo.

Brentford forward Igor Thiago-a tang mezüngbuba team nung züngoksemogo.

Barcelona forward Raphinha aser Real Madrid nungi asayar Vinicius Júnior nati anir Brazil team attack süa asayatsü aser Chelsea nungi João Pedro aser Matheus Cunha nata team nung lir.

World Cup nung Iran asaya Mexico-i belener aotsü sensaksemdar

Metsüremi/March 17, 2026

(Agencies): World Cup 2026 nung Iran team asaya United States nungi co-host Mexico-i belener aotsü atema Iran football federation-i FIFA den sensaksemdar, kechiyong asayatem kümzüka toktsütsüji kanga tongtibang lir, ta Iranian football tir Mehdi Taj-i ashi.

"US tir Donald Trump-i pai Iran national team kümzüka metoktsütetsü ta shiogo anungji onok America-i maotsü," ta Taj-i Hombarnü Mexico nung Iran embassy indang X account nung post ka ajanga ashi.

"World Cup nung Iran team asaya Mexico nung asayatsü atema onoki tang FIFA den sensaksemdar," ta paisa shisem.

Iran sports minister-i taoba hopta, US aser Israel nati February ita tatemlen nungi anung ajanga linük amak tenzüka linük lenir aser tanga

yimden yimsüsür aser military lenirtem tepsetba sülen asayatem iba asayamung nung masayatetsü ta shir liasü.

Trump-i Iran team US-i arua asayatsü asoshi pelashishia jaoktsü, saka parnok taküm asoshi linüki arua masayaba tajungba asütsü ta shiogo.

Team 48 asayatsü aliba asayamung atema Iran qualify süatokogo, koba US, Canada aser Mexico nung June 11 nungi tenzüka asayatsü lir. Iran team group asaya ana Los Angeles nung aser ka Seattle nung asayatsü lir.

Parnok ya Asia nungi World Cup atema qualify asüba mezüngbuba team lir. Parnok 2025 küm March ita 25 nü qualify süa liasü.

US aser Israel nati February 28 nü nungi Iran amak tenzüka sülen hopta asembuba raratepdar.

Metemsüba asayar asayadaksüba atema Malaysia merenshi

Metsüremi/March 17, 2026

(Agencies): 2027 Asian Cup atema qualifier asaya ana nung temsüa maliba asayatem asayadaksüba atema Malaysia team iba asayamung nung masayatetsüsa kümogo, ta Asian Football Confederation-i Mongolbarnü metetdaksü aser iba ajanga Vietnam qualify süogo.

Bendanglen asoba asayar teneti kuli kakat taila amshia Malaysia national team nungi asayaba atema parnok merenshia liasü.

"Defendant-i AFC Asian Cup 2027 (Qualifiers Final Round) asaya nung temsüa maliba asayatem asayadaksü," ta Asian Football Confederation-i ashi.

Iba telemtetba agiba ajanga parnok indang qualifying group nung Vietnam point trok agi timba kümogo.

Asaya ano round ka asayatsü lir aser Vietnam o Malaysia na March 31 nü asayatsü koba dead-rubber match ka dang asütsü.

Taoba küm June ita qualifier nung Vietnam goal 4-0 agi akokba asaya nung

Asayatem ya Hector temsüa maliba asayar tenet asayadaksü ta taitsüba adokba sülen FIFA-i bushisüngdang tenzüka liasü. Iba asaya den ano taoba küm March ita Figueiredo ta jangjaogo.

Nepal team goal 2-0 agi akokba asaya anaprongla magi küm daksüogo.

FIFA-i asayatem ya ka danga Malaysia nungi jakzükkba masü aser parnoki kuli kakat taila amshi ta nguteta liasü.

FIFA-i asayatem nem tenokdangba agütsüba den Football Association of Malaysia (FAM) dang senchi USD 448,000 dak tema chia liasü.

Iba sülen FAM aser asayatem Swiss nung amendaker aliba Court of Arbitration for Sport (CAS) nem temepishiba ka agüja liasü.

Iba ita tetenzüklen CAS-i asayar tenet nem tenokdangba agütsür aliba ajemtsüogo. Parnok pei club nung training agitettsü aser football dak sendakba inyakyim nung shilem agitettsü, saka official asayatem nungbo küm ka masayatetsü, koba taoba küm September ita nungi tenzüktsü.

FIFA-i asayatem rongnung parnok asem Argentina nungi, ana Spain nungi, Dutch nunger asayar ka aser Brazil nunger asayar ka ta nguteta liasü.

Asayatem ya Hector Hevel, Jon Irazabal, Gabriel Palmero, Facundo Garces, Rodrigo Holgado, Imanol Machuca, aser Joao Brandao Figueiredo ta jangjaogo.

BILEMDANGANG

"Tamashir den toktepra na-a tamashir ka akümtsü."